



Ein cyf/Our ref KW/06828/20
Janet Finch-Saunders AS
Cadeirydd, y Pwyllgor Deisebau

15 Rhagfyr 2020

Annwyl Janet,

Diolch am eich llythyr ynghylch deiseb P-05-1091, sy'n gofyn i ddileu Bagloriaeth Cymru orfodol i fyfyrwyr sydd am fynd i'r Brifysgol.

Nid oes unrhyw ofyniad statudol i ddysgwyr ddilyn unrhyw gymwysterau. Felly, nid yw'r Dystysgrif Her Sgiliau (sy'n rhan o Fagloriaeth Cymru) yn orfodol. Fodd bynnag, polisi Llywodraeth Cymru yw ein bod am i bob dysgwr elwa ar Fagloriaeth Cymru, a chyflawni'r Dystysgrif Her Sgiliau. Drwy ychwanegu sgiliau cyflogadwyedd a datblygiad personol hanfodol at astudiaethau academaidd neu gymwysterau galwedigaethol, mae Bagloriaeth Cymru yn helpu i baratoi pobl ifanc ar gyfer addysg uwch neu addysg bellach, cyflogaeth a bywyd. Mae'n rhoi cyfle i'n dysgwyr feithrin y sgiliau ehangach a'r wybodaeth sy'n cyd-fynd â phedwar diben y cwricwlwm newydd, ac adeiladu arnynt.

Ein polisi yw annog pob ysgol a choleg i'w chynnig fel rhan o'u rhaglenni dysgu. Mae polisi cyllido ôl-16 Llywodraeth Cymru yn parhau i alluogi dysgwyr i sefyll hyd at bedair Safon Uwch neu gyfwerth a'r Dystysgrif Her Sgiliau. Mae'n bosibl na fydd astudio'r Dystysgrif yn ddewis cywir i bob dysgwr, ac felly mae angen i ni arfer rhywfaint o hyblygrwydd. Y cyngor i ysgolion a cholegau yw y dylent ddarparu cyfleoedd sydd er budd pennaf eu dysgwyr. Rydym yn disgwyl iddynt ddefnyddio'u barn broffesiynol drwy roi ystyriaeth ddyledus i lesiant pob person ifanc a'i allu i gyflawni ei lawn botensial, wrth benderfynu a ellir eithrio dysgwr rhag dilyn Bagloriaeth Cymru a'r Dystysgrif. Ceir gwybodaeth bellach ar ein gwefan <https://llyw.cymru/bagloriaeth-cymru>.

Mae llawer o brifysgolion bellach yn cynnwys y Dystysgrif mewn cynigion ac mae'r prosiect unigol yn aml yn darparu tystiolaeth dda a pherthnasol mewn datganiadau ategol a chyfweliadau hyd yn oed os nad yw'n cael ei dderbyn fel rhan o'r cynnig gradd. Cydnabyddir bod y Dystysgrif yn gymaradwy mewn her i Safon Uwch ac mae'n derbyn yr un nifer o bwyntiau UCAS. Mae prifysgolion Cymru, a nifer o brifysgolion Grŵp Russell, yn glir eu bod yn gwerthfawrogi'r Dystysgrif ac yn mabwysiadu dull cynyddol hyblyg o'i chydabod yn eu cynigion.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Kirsty.Williams@llyw.cymru
Correspondence.Kirsty.Williams@gov.wales


Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

O fewn y wybodaeth ychwanegol a ddarparwyd gyda'r ddeiseb, mae'r deisebydd yn awgrymu datblygu cymhwyster UG. Mae Cymwysterau Cymru yn gyfrifol am bennu gofynion lefel uchel ar gyfer cymwysterau allweddol, gan gynnwys Bagloriaeth Uwch Cymru, ac yn ddiweddar cynhaliwyd ymgynghoriad ar gynigion ar gyfer Tystysgrif Her Sgiliau Uwch newydd. Mae'r ymgynghoriad bellach wedi dod i ben, a gobeithiaf dderbyn gwybodaeth am gynigion arfaethedig yn y gwanwyn.

Mae Llywodraeth Cymru yn cydweithio â chonsortia, CBAC, Cymwysterau Cymru a Colegau Cymru i wella'r ffordd rydym yn cyfathrebu buddion Bagloriaeth Cymru a sut y gall gefnogi dysgwyr i ddatblygu eu sgiliau a'u hyder ehangach, gan eu galluogi a'u grymuso i gymryd eu lle fel dinasyddion cyfrifol a gweithgar mewn cymdeithas amrywiol.

Yn gywir

A handwritten signature in black ink, appearing to read 'Kirsty Williams'.

Kirsty Williams AS/MS
Y Gweinidog Addysg
Minister for Education